

歷代 日記叢鈔

學苑出版社

歷代日記叢鈔

第一三七冊

© 1995 by National Sun Yat-sen University Library

日記叢鈔

傭廬日記語存弁言

傭廬日記語存意約而婉語精而顯發憤進取而實不越乎中行飭己明民而究一本於倫理磊落而照人不光明者烏有也肝膽而動物不公誠者烏有也表彰潛德豈徒保全乎善類涵容不肖終能褻服乎人心讀是著而不頑廉懦立鄙寬薄敦者必非人情亞聖有言奮乎百世之上百世之下聞者莫不興起其公之謂歟甲戌嘉平陳克正識

張君石琴往年閱日記語存畢謂予曰使局戶三年置君於一室中亦不能有此著作蓋非閱歷之久滄桑之變無其事則無其理不能憑空而臆撰也又篇中除責己外凡所論議亦以取資自鏡若閱者謂爲徒肆譏評則誤會矣甚不可也乙亥仲秋袁金鎧自識於傭廬

篇中有注語者漢爲石琴都轉瀋陽張之漢祿爲澹堪太守烏拉成多祿瀏爲亮伯觀察浦口

陳瀏傭廬又識

是編所記起壬辰仲冬訖乙亥孟秋計四十三年書凡六卷前三卷有張石琴成澹堪陳亮伯三君加批潔珊先生一生事蹟略具於是其說理也不尙高深其論事也不爲苛刻隨時隨地務示人以易知易行坦白忠誠絕無浮僞讀者不獨於先生出處可以得其梗概而於持身涉世之道亦可藉識徑途先生每有撰述輒使校訂管窺所及附綴數言乙亥中秋遵化史錫華

識

傭廬日記語存目錄

卷一

壬辰至戊申

卷二

己酉至戊午

卷三

己未至癸亥

卷四

甲子至丁卯

卷五

戊辰至辛未

卷六

壬申至乙亥七月

卷七

乙亥至丙子

卷八

丁丑至庚辰九月

備廬日記語存目錄

備廬日記語存卷一

遼陽袁金鎧兆備

光緒十八年壬辰冬十一月初四日偶見曲君賡三一敦復堂日箴歸而效之且願終身不倦今三十年矣覆而按之不無可存之語暇輒摘錄以示後人壬戌元旦兆備識

此爲潔珊初學作人之始良友一言終身行之不倦此是何等明決何等沈毅其用心之專

也可敬其進德之猛也可畏

祿注

初寫日記時在省垣龍王廟伴讀年二十三歲

向見人爲境遇所迫遂致改易初衷操持不固意甚薄之今而知處危疑震撼之際而毅然不

動者大非易事念及此殊懍懍焉

十二月十八日

制心之難也非歷練深操存熟欲不爲外物激動豈可得哉匹夫輕生梟桀走險胥由是也

張之漢

以上所述非有根器者不能測

發言之際慷慨激昂鋒芒畢露雖當時不無自知之處而意氣太盛遂不暇檢制噫恂恂氣象鄉黨以之狀聖人旨深哉二十一日

計一年所課存心立品似稍有見但行之不力是仍自菲薄念及此覺欲戒欺而欺愈甚欲求慊而慊愈難矣

戒欺求慊知其難卽是戒與求之鞭策漢

標榜習氣甚非古人擇交之義憶陳忠節公

克讓字問山

有云友非知己不妨疏願佩斯言重吾交

以重吾友

疏於始勝於棄於終也

祿

君子之交淡如水世之凶終隙末者皆不能慎之於始也

本年訂日記冊覺逐日尙有愧勵處儻持之不久不待名節敗壞已負我初心矣其懷慚奚似

除夕

若非日對嚴師則一事徇慾事事諄理誤入歧趨毫釐千里而欲名節之終不敗壞難矣

癸巳時年二十四歲在東關英牛条官廳自習秋闈赴京

讀魏環溪庸言湯潛菴語錄於二公理學經濟不勝慨慕

正月初十日

英年瀏覽書籍即能占人之志趨與成就傭少時見理學名臣著作則心好而意羨之一生作人基於此矣同一涉獵書籍有喜詞章者有喜智術者甚有專愛閱風月豔情花柳蕩語者而人品志趣判若霄壤矣漢嘗訪一青年學者因聞人言其學品才地極好思欲汲引之也至則其人未在寓見座右書冊縱橫似隨手披覽者檢閱一二冊則玉嬌梨海上繁華錄

等類不禁嗒然掃興而返又越數年果聞此人以蕩檢事牽入訟獄乃歎觀人之不謬也漢

評論文藝得失語太淺露殊欠蘊藉與良在明翁閒話有不醞釀處伊微駁之心甚愧

端莊凝重簡默沈靜乃爲德器若英氣逼人終難免浮躁之譏事後自思得失自見二十六日

出語有近敏妙處蹈才人惡習 三月二十七日

義利理欲之交操守未密恐一朝潰敗衾影懷慚懼甚

動多靜少精神未能完固非養身道理三十日

心多怠緩語言有乖忤直率等病惟見賢思齊之誠尙能隨時激發亦或有急起直追之一日

乎四月二十日

陳君子升言余神色嚴肅詞氣爽直非處俗人之道五月十七日

與曲君賡三共述生平互相勗勵有西子蒙不潔之懼因思有恆二字大是難事若一墮落愧

孰甚焉六月十五日

形人短矜己長克伐怨欲疵累叢集固輕於發言之過亦實由心氣浮躁辦理未精未克返躬刻求體帖入微之故幸賡三挾摘入細指示親切不勝愧奮感激莫名儻不自愛則任意肆情師友將何屬望二十八日

責人恆嚴責己每寬甚非學者進修之道七月初三日

責人嚴責己寬傭自省如此漢則謂傭之性太厚責人責己同一厚卽同一寬也漢

心中歉仄自覺可憎蓋氣亢志高實不欲甘居人下而悠悠無恆光陰坐廢又決無如人處故每一撫躬自審輒不禁抑鬱無聊耳噫獨不能刻苦以有恆耶十四日

閱曾文正公家書欣慕頗切雖不能則倣萬一尙知天壤間有此等人時懸心目亦可爲暴棄者發聵振聵之資矣十五日

私欲紛起於克己工夫相去天壤因強制之然勉強抑伏濟得甚事恐藏賊於中爲禍更烈二

十七日

此存誠者之貴去僞也否則蘊毒於中爲禍更烈明心見性者不可不知劉

談曾文正公事賡三謂余年富力強境遇順適宜及時加勉取法乎上庶不至與草木同腐聞

茲讜論發人深省但恐暴棄自甘終無成就未免負人期許耳思至此不禁惕惕二十九日

出門應由舊路復回乃意嫌迂曲愈趨便捷愈致阻隔知天下事苟且目前希圖微倖欲速而

反緩者大都類此八月初四日

日記寫十餘月展卷覆之進德修業茫無足據歲華荏苒愧悚殊深然此冊不廢行之終身以

識吾過用自省察其益正自無窮願持之畢生勿稍間斷二十二日

悉屯中訟累處有事之時宜鎮定從容精詳審慎爲人爲己面面俱到斯爲上乘不然方寸無

主顧此失彼潰敗既多豈不貽憾今畏葸之情尙不至紛吾念慮特一不慎密卽貽笑旁觀念此殊懷懷也九月初六日時遭訟累

此正天之磨礪賢豪也 瀏

閱倭文端公日記人當刻自省察見眞守定迨性天瑩澈善意圓滿身分自高不可及當先生寫日記時豈復計及數十年後有慨慕無窮者耶遺卷長留乾坤生色孰謂先生果死乎十九日古人處大變故不失其常今少有拂意即鬱鬱不自得總由不能斬斷柔牽卓然起立二十一日自今以往事故日紛德慧日損四五十轉瞬即到無聞耶見惡耶蓋可必矣二十三日

陰雨數點萬樹秋聲旅館蕭然寒燈獨對感時觸物曠然有身世之悲噫歲月迭更依然故我讀書有願進德無恆歎甚二十六日

古人爲學苦心孤詣故經濟文章卓卓天壤今雖從事修途總無救火追亡景象只覺兩餐一

睡又虛度此生一日 十月初七日

因人觀己缺欠處不可勝數初八日

此則借鏡有得之言劉

當有事之時意思未能安閑語言未能慎密且因人感召心地漸生機械將流入精明警變一流幾失本來甚非處世以敬與人以誠之道儻不痛改恐傾軋相尋必囂然其不寧矣可懼哉

初九日

失言病痛無日無之不敬故也敬則戒慎恐懼精氣內斂無應而端其主既事而惕其衷何至罅漏百出乎事誤於初難善於後晦翁云須思慮到人所不思慮處防備到人所不防備處噫眼光心血吾輩當有獨到處若偷安目前無慮遠思深之意則措置乖方禍機隱伏矣危哉十

七日

晦翁此二語是千古應世之要言 漢

小人情狀如鬼如蜮百計千方肺肝如見以鎮定處之彼勞我逸彼短我長勝算高著願以此
馭天下事

憂勤惕厲堅苦卓絕無此八字決難成就 二十九日

非下切實工夫不可祿

至蔡屯尹宅贊禮風緊雪狂牛車行緩默誦詩賦數首冷思皎潔人境俱清僕人畏凍欲僵余
整頓精神欣然意適此事極爲尹曉泉師所稱許 十一月十六日

心一清不獨熱念頓消冷念亦頓消人何必自煎其心而不一思振作哉 祿

誠以處物物有不獻誠者乎 十八日

此可爲欺人以自欺者當頭一棒 劉

議屯事某君勸余斟酌盡善務存厚道勿與鄉里搆釁致傷和氣深韙其言輒委曲求全俾歸親睦即萬不獲已終不愬然忘情置之危地蓋雖不敢謂具胞與衷懷而緬懷往哲廣大寬平無所不容氣象何等恢宏何等灑落若恩怨分明自隘其宇則傾軋相尋無所底止豈日讀聖賢書所學顧止此耶事後追思必有愀然大不安者胡弗早爲計也 二十七日

心時有外馳處慎獨功未密也須有臨之在上質之在旁意境庶幾光明正大慊我初心 十二

月初四日

凡人避嫌者皆內不足也人果至公何避嫌之有避嫌之事賢者不爲今鉅任獨肩權衡自我果能磊落光明纖塵不染清夜捫心應無愧怍若沾沾焉自矜廉節故爲表著猶是小丈夫行爲蓋雖未敢以賢者自待使稍近卑汙則天地鬼神實監臨之每念及此輒誦吳隱之句試使夷齊飲終當不易心 初六日

避嫌爲內不足故不避嫌豈即爲內足乎此等事只問吾心所謂嫌者猶有人之見存也漢
日對狂藥惟有絕不入口之一法否則摩登嬌席未有不敗道者瀏

作事胸有成竹縱狡如山鬼其奈我何其要總由鎮定初九日

逐日忙迫身心俱瘁問學就荒光陰虛擲此造物之磨厲我也奈非鐵中錚錚何初十日

自九月六日由京回省事變百出如行山陰道上應接不暇至辦事雖無因循畏懦之病然意
氣之盛剛果自負其流弊將至矜情傲物睥睨羣倫勢不至摧辱不止且和平渾厚養福之基
今英氣逼人鋒芒外露自家視之亦覺神致懍然無許多溫厚况他人視之耶福澤壽算胥關
乎此所係非小須於涵養著力

陳子升言余天性近薄失於清刻亟須藉學以變化之良朋惠我出刻論以挾隱微因此而獲
內省其益無窮十三日